

C A L E T E S ET B O N O N I E N S E S.

DE hoc tractu Bononiensi sic dicit Robertus Cœnalis, de re Gallica libri. II. Perioche. III. De Gessoriaco Morinorum portu rectè cum Meiero dixerim, verè dici Boloniam maritimam, à qua ad Douerium portum Angliæ, breuissimus est traiectus. Gessoriacum autem nauale (quod falsò Gandauum Bilibaldus affirmat) potius crediderim esse Castellum, nunc Cassel. Sunt, qui alio nomine Petressam vocant, & Scalas, vulgò Scales. Porro ex Boloniæ situ facilè est coniectare, an Iccius portus dici debeat. Qua in re ne quis hæsitet, illud ex Strabone sciendum, Interiectum maris ab Iccio in Angliam, trecenta viginti, nec amplius, stadia complecti; quæ ex æquo constituunt milliaria quadraginta. Porro Tabulæ recentiores designant à Bolonia ad Douerium milliaria Anglicana sexdecim, nempe Italicis longiora, à Calesio verò octodecim. Quo liquidò constat, à Bolonia in Angliam traiectum esse breuissimum. Differunt itaque portus Gessoriacus, & Gessoriacum nauale: quod nouissimum si quis Casletum dixerit, nolim cum eo contendere. Hæc ille. Hanc ipsam Boloniam his verbis depingit Arnoldus Ferronius, qui Pauli Æmylij historiam Gallicam ad sua vsque tempora deduxit. Est autem Bononia & inferior, quam vocant, & superior. Bononia inferior, vicus non septus mœnibus ante Anglorum aduentum; Ibi fanum Diuo Nicolao Sacratum, & aliud Franciscanorum Sodalium. Mare Anglicum, vicum alluit: prope Fanum sodalium, quod non longè abest à mari, facillimus traiectus in Angliam. Abest à Bononia superiore centum ferè passus, & eò quid fortè amplius. At Bononia superior, cincta mœnibus validissimis. Ibi fossæ præaltæ, muros ambientes. Totus ille locus sabulosus, ex eo genere, quod sabulum feruens maritimi homines vocant. Vnde Boloniæ nomen à feruenti sabulo, Gallico nomine inditum putant, tametsi vetus esse nomen ex Amm. Marcellino esse videamus. Hactenus Ferronius.

V E R O M A N D V I.

HVnc tractum, quem olim Veromandui inhabitauerunt, hodie adhuc retento antiquo nomine VERMANDOIS vocant. Hinc duo flumina Soma & Schaldis originem sumunt. Hic olim teste Roberto Cœnali fuit Augusta Veromanduorum, nunc diruta, restante pro reliquiis Cœnobio, sedes olim Episcopalis. Vide de iis populis sententiam Petri Diuei, in libello antiquitatum Galliæ Belgicæ.